



20

Niining Leksyona Matun-an Mo Kini

Ang Pagkabanhaw ni Jesus

Nagpakita si Jesus Ngadto Kang Maria Magdalena

Nagpakita si Jesus Ngadto Sa Iyang Mga Tinun-an

Si Jesus Ug Si Tomas

Ang Katuyoan Niining Libroha

ANG PAGKABANHAW NI JESUS (Basaha ang Juan 20:1-10)

Sa wala pa gilansang si Jesus giingnan Niya ang Iyang mga tinun-an sa makadaghan nga Siya pagapatyon. Gipasabot Niya kanila nga mabanhaw Siya pag-usab. Apan sa dihang namatay na gayud si Jesus ang mga tinun-an wala na makahimundon sa gisulti ni Jesus mahitungod sa Iyang pagkabanhaw.

Gikan sa ubang magsusulat sa ebanghelyo atong matun-an nga si Maria Magdalena ug uban sa ubang mga babaye miadto sa dapit nga gilubngan ni Jesus. Ilang butangan ug pahumot ang lawas ni Jesus, sumala sa ilang nabatasan. Ug nakita nila nga ang dakung bato nga gi-alitubangan sa lubong naligid na sa layo. Ug ang lubnganan wala nay sulod! Midagan dayon si Maria aron pagsulti sa mga tinunan sa maong hitabo. Ug samtang ang ubang mga babaye nagapabilin didto sa luyo sa lubnganan, ang manulonda miingon nga nabanhaw si Jesus.

Si Pedro ug Juan miadto sa lubnganan aron pagsusi ug nakita nila ang lubnganan nga walay sulod. Ang nabilin lamang didto mao ang panapton nga giputos sa lawas ni Jesus. Nagtoo si Maria nga gikawat sa mga kaaway ni Jesus ang lawas. Apan nasayud si Pedro ug Juan nga kon gikawat pa dili na sila maglangay sa pagkuha sa panapton nga giputos sa iyang ulo. Unsa man diay ang nahitabo kang Jesus. Ug uban sa dakung

paghunahuna mipauli sila didto sa ilang balay sa Jerusalem.

Buhata Kini

1. Nganong miadto man si Maria sa lubnganan ni Jesus?
 - . . . a) Buot siyang mosusi kon namatay ba gayud si Jesus.
 - . . . b) Buot Niyang digoon sa pahumot ang lawas ni Jesus.
 - . . . c) Buot siyang makigsulti sa hardenero.

2. Unsa may nakaplagan ni Maria sa pag-abot niya sa lubnganan?
 - . . . a) Abli ang lubnganan ug walay sulod.
 - . . . b) Si Jose ug si Nicodemo nagdigo sa lawas ni Jesus.
 - . . . c) Gikawat sa mga kaaway ni Jesus ang Iyang lawas.

3. Unsa may nakita ni Pedro ug Juan sa ilang pag-adto sa lubnganan?
 - . . . a) Nakita nila ang mga sundalo ug nangutana sila kon unsay nahitabo.
 - . . . b) Nakita nila ang hardenero ug nangutana sila kon diin gibutang ang lawas ni Jesus.
 - . . . c) Nakita nila ang panapton nga giputos kang Jesus didto sa lubnganan.

NAGPAKITA SI JESUS NGADTO KANG MARIA MAGDALENA

(Basaha ang Juan 20:11-18)

Usahay ang mga katawhan maguol kaayo tungod sa kamatayon sa usa ka hinigugma. Ug tungod niini dili na sila makatoo sa pulong sa Dios. Bisan pa ang mensahi nga gisulti sa manulonda ngadto sa ubang mga babaye, nga nabanhaw na si Jesus wala makapato sa mga tinun-an o kang Maria. Nagkinahanglan panga makita gayud nila si Jesus aron motoc sila nga buhi Siya.

Si Jesus moanhi usab ug pahibaloon ta Niya nga Siya buhi. Himoon Niyang kalipay ang atong mga luha. Ug ipadala ta Niya sama kang Maria aron sa pagpakig-ambit sa mensahe ngadto sa uban. Ang mga babaye maingon man sa mga lalaki aduna niining responsibilidadada. Si Maria mao ang unang nakita sa nabanhaw nga Cristo ug sa pagdawat sa Iyang mensahe.

Buhata Kini

4. Sa dihang miduol si Jesus kang Maria didto sa harden unsa may gisulti ni Jesus?
- . . . a) Gipahunong Niya sa paghilak.
 - . . . b) Gipapauli Niya sa ilang balay.
 - . . . c) Gipapauli aron sultihan ang mga tinuan.

**NAGPAKITA SI JESUS NGADTO SA IYANG
MGA TINUN-AN****(Basaha ang Juan 20:19-23)**

Nianang adlaw sa pagkabanhaw ni Jesus nagpakita Siya sa Iyang kaugalingon ngadto sa Iyang mga tinun-an. Nanirado ang Iyang mga tinun-an sulod sa balay tungod kay nahadlok sila nga ang mga kaaway ni Jesus mosulong kanila. Sa ilang pagkakita kang Jesus wala sila makatoo dayon sa ilang nakita apan gipakita ni Jesus ang Iyang mga kamot nga nalansangan ug ang kilid aron pagpatoo kanila nga Siya mao gayud si Jesus ug dili multo. Ug nalipay sila nga si Jesus nabuhi pag-usab!

Miingon si Jesus pag-usab ngadto kanila nga gipadala Niya sila sama sa pagpadala sa Amahan Kaniya. Nagkinahanglan sila ug pinasahi nga magtatabang sa ilang buluhaton ug gihatagan Niya sila. Miingon si Jesus nga madawat nila ang Espiritu Santo. Atong matun-an gikan sa mga Buhat nga ang mga tinun-an nakadawat sa Espiritu Santo mga 50 ka adlaw sa wala pa moabut ang adlaw sa Pentecostes. Si Jesus magahatag gihapon karon sa Espiritu Santo sa matag Cristohanon nga buot magpagamit alang sa Iyang buluhaton.

Ang pagtuman sa mga tinun-an sa sugo ni Jesus maoy basihan kon maluwas o dili ba ang mga katawhan. Kon wala pa sila mola-kaw aron sa pagwali sa ebanghelyo, ang mga makasasala dili gayod makahibalo sa dalan sa kaluwasan tungod kay sila dili man mahibalong mag-ampo sa kapasayloanan.

Kon kita mga Kristohanon na kinahanglan sultihan ta ang uban mahitungod kang Jesus. Kon atong nasinati ang nabanhaw nga Kristo ug kon napunan na kita sa Espirito Santo, nan makahimo gayud kita sa pagtabang sa uban ngadto sa kaluwasan.

Buhata Kini

5. Unsa may gisulti ni Jesus ngadto sa Iyang mga tinun-an?
 - . . . a) Kinahanglan nga motago sila.
 - . . . b) Gipadala Niya sila ingon sa pagpadala sa Amahan Kaniya.
 - . . . c) Kinahanglan mamauli sila.
6. Unsa man ang pinasahi nga tabang nga gisaad ni Jesus nga magatabang kanila sa ilang mga buluhaton?
 - . . . a) Suholan sila ni Jesus sa pagwali sa maayong balita.
 - . . . b) Hatagan sila ug kalipay ug dili na gayud sila maguol.
 - . . . c) Hatagan Niya sila sa Espirito Santo
7. Sa unsang paagi sila makadala sa mga tawo ngadto sa kaluwasan?
 - . . . a) Pinaagi sa pagpasaylo sa ilang mga sala.
 - . . . b) Pinaagi sa pagwali sa maayong balita mahitungod kang Cristo.
 - . . . c) Pinaagi sa pagdagkot ug mga kandila.

SI JESUS UG SI TOMAS
(Basaha ang Juan 20:24-29)

Si Tomas wala motoo sa nakita sa mga tinun-an. Nagduhaduha siya sa kasinatian sa kauban niyang mga tinun-an ug miingon nga buot siya nga makakita sa iyang kaugalingon gayud nga mga mata.

Daghang mga tawo karon ang naghunahuna nga ang mga Cristohanon nangasayop. Apan kinahanglan susihon nila sa ilang kaugalingon gayud. Kon tinuod silang matinud-anon, kinahanglan moampo sila. Tingali dili nila makita si Jesus sa ilang mga mata apan mosulti Siya kanila diha sa ilang mga espiritu. Ug sama kang Tomas makaingon sila, "Ginoo ko ug Dios ko."

Juan 20:29. Ug si Jesus miingon kaniya, "Mitoo ba ikaw tungod kay nakita mo ako? Dalagyon kadtong wala managpakakita, ngani nanagpanoo."

Buhata Kini

8. Unsa may gisulti ni Tomas sa iyang pagkakita kang Jesus?

- . . . a) "Dili ko motoo niini."
- . . . b) "Husto kamo."
- . . . c) "Ginoo ko ug Dios ko! "

ANG KATUYOAN NIINING LIBROHA (Basaha ang Juan 20:30-31)

Sa tanang mga kahibulongang butang nga nakita ni Juan diha sa kinabuhi ni Jesus ug sa mga nabatian niya gikan Kaniya, gisulat lamang ni Juan diha sa iyang ebanghelyo kadtong makatabang kanato sa pag-ila nga si Jesus mao gayud ang anak sa Dios.

Juan 20:31. Kining ania gisulat aron motoo kamo nga si Jesus mao ang Cristo, ang Anak sa Dios, ug nga sa pagtoo makabaton kamo ug kinabuhi diha sa iyang ngalan.

Buhata Kini

9. Sag-uloha ang Juan 20:31.
10. Unsa may katuyoan ni Juan sa pagsulat niya sa iyang ebanghelyo?
 - . . . a) Aron pagpasabot kanato nga si Jesus mao ang Anak sa Dios.
 - . . . b) Aron isulti ang tanang gibuhathat ni Jesus.
- 11; Itandi ang imong mga tubag sa hustong mga tubag nga anaa sa katapusan niining leksyona.
- 12 Sulati ang imong rekord sa estudyante alang sa ika-20 nga leksyon.

Mga Tubag sa Ika-20 nga Leksyon

Kon duna kay 8 ngadto sa 9 ka mga hustong tubag, markahi ug labing maayo ang imong grado; kon 6 ngadto sa 7, markahi ug maayo; kon 5, kasarangan; kon kubos sa 5 ang imong hustong mga tubag, basaha pag-usab kining leskyona.

1. b) Buot niyang digoon sa pahumot ang lawas ni Jesus.
2. a) Abli ang lubnganan ug walay sulod.
3. c) Nakita nila **ang** panapton nga giputos ni Jesus didto sa lubnganan.
4. c) Pagpanlakaw ug paghatag ug mensahi ngadto sa tanang mga tinun-an.
5. b) Gipadala Niya sila ingon sa pagpadala sa Amahan Kaniya.
6. c) Hatagan Niya sila sa Espiritu Santo.
7. b) Pinaagi sa pagwali sa ebanghelyo.
8. c) "Ginoo ko **ug** Dios ko "
10. a) Aron pagpasabot kanato nga si Jesus mao ang Anak sa Dios.

Gidaghanon sa Hustong Tubag _____

Grado _____